



# Theatr Genedlaethol Cymru

## Pecyn Recriwtio Ymddiriedolwyr

Diolch am ddangos diddordeb mewn ymuno â Bwrdd Ymddiriedolwyr Theatr Genedlaethol Cymru. Ry'n ni'n edrych am bobl sydd â diddordeb angerddol yn y celfyddydau, sydd ag uchelgais, ac sy'n frwdfrydig.

Ry'n ni'n edrych am rai Ymddiriedolwyr sydd â sgiliau a phrofiad penodol, ac ry'n ni hefyd yn awyddus iawn i gael cynrychiolaeth o amrywiaeth o bobl a chymunedau. Mae profiadau personol a safbwyntiau gwahanol yr un mor werthfawr i ni, wrth i ni geisio llywio'r cwmni drwy'r cyfnod heriol yma, cyflawni ein gweledigaeth a chyrraedd ein nodau strategol. Mae digwyddiadau 2020, megis COVID-19 ac ymgyrch Black Lives Matter, wedi herio'r 'norm' a dangos i ni fod yn rhaid i ni newid ein ffyrdd o weithio, o gynhyrchu theatr ac o ymwneud â'n cynulleidfaoedd. Mae rôl bwysig gan yr Ymddiriedolwyr yn y broses hon o newid – yn amrywio o gynrig syniadau a chefnogaeth, i herio a dwyn i gyfrif.

Mae bod yn un o Ymddiriedolwyr Theatr Genedlaethol Cymru yn rhoi cyfle gwerthfawr i gyfrannu at ddiwylliant Cymru, i fod yn rhan o fyd y celfyddydau, a mynychu digwyddiadau a pherfformiadau. Mae bod

yn Ymddiriedolwr yn eich galluogi i wneud gwahaniaeth a chyfrannu at ffyniant y cwmni a theatr Gymraeg yn y dyfodol.

Mae'n bwysig iawn i ni fod Bwrdd yr Ymddiriedolwyr yn cynrychioli amrywiaeth mor eang â phosib o bobl. Rydym yn cydnabod bod rhai grwpiau wedi eu tangynrychioli ar y Bwrdd ar hyn o bryd – pobl ifanc (dan 30 oed); pobl o gefndir Du, Asiaidd a Lleiafrifoedd Ethnig; a phobl anabl. Os ydych yn uniaethu gydag un neu ragor o'r grwpiau yma, bydden ni'n arbennig o awyddus i dderbyn cais gennych.

Ceir rhagor o wybodaeth am y rôl yn y pecyn hwn. Byddem yn ddiolchgar iawn petaech yn llenwi'r ffurflen mynegi diddordeb er mwyn i ni gael dysgu tipyn amdanoch chi, ac i chi gael dweud sut y byddech yn dymuno cyfrannu at waith y cwmni.

Os hoffech gael sgwrs anffurfiol ar unrhyw bwynt yn ystod y broses ymgeisio, mae croeso i chi gysylltu â mi:

[angharad.leefe@theatr.com](mailto:angharad.leefe@theatr.com)

07903 842554

*Angharad Jones Leefe*

Cyfarwyddwr Gweithredol ac Ysgrifennydd Bwrdd yr Ymddiriedolwyr

## Y Cwmni

Rhoi theatr Gymraeg wrth galon y genedl

Mae Theatr Genedlaethol Cymru yn creu a chyflwyno cynyrchiadau theatr sy'n anelu at ddifyrru, cyffroi a swyno ein cynulleidfaoedd a thanio eu dychymyg. Rydym hefyd yn darparu cyfleoedd datblygu a fydd yn meithrin ac ysbrydoli'r genhedlaeth nesaf o artistiaid theatr Cymraeg, ac yn cynnig cyfleoedd creadigol i bobl ledled Cymru brofi effaith drawsnewidiol y celfyddydau.

Sefydlwyd y cwmni yn 2003, ac mae'n un o'r wyth sefydliad sydd wedi'u dynodi fel 'cwmnïau cenedlaethol' gan Gyngor Celfyddydau Cymru. Fel cwmni cenedlaethol, mae disgwyl i ni ddangos arweinyddiaeth o fewn y sector, meithrin a datblygu talent, gwneud y mwyaf o gyfleoedd partneriaeth a chydweithio, datblygu a chynyddu cysylltiadau rhyngwladol, a chyrraedd y cynulleidfaoedd mwyaf eang posibl.

### **Mae'r cwmni yn cyflogi:**

- 12 aelod o staff craidd
- Dros 250 o weithwyr llawrydd y flwyddyn

### **Dros y 3 blynedd ddiwethaf (Ebrill 2017 - Mawrth 2020):**

- 42,000 o fynychwyr i'n perfformiadau
- 20,300 o ymgyfranogwyr i'n digwyddiadau ymgysylltu

### **Yn ystod y cyfnod clo\*:**

- 70,000+ o wyladau (views)
- 8 darn newydd, yn cynnwys 3 pherfformiad byw
- 7 ffilm o'r archif

\*Mae'r wybodaeth uchod yn seiliedig ar waith y cwmni o fis Ebrill tan ddiwedd mis Awst 2020.

## **Bwrdd yr Ymddiriedolwyr**

Mae Bwrdd yr Ymddiriedolwyr yn gallu cynnwys hyd at 12 aelod, yn cynnwys y Cyfarwyddwr Artistig (yn rhinwedd ei swydd). Ar hyn o bryd rydym yn edrych am hyd at bedwar Ymddiriedolwr newydd.

Mae'r Ymddiriedolwyr yn cyfarfod o leiaf dair gwaith y flwyddyn ar gyfer cyfarfodydd llawn o'r Bwrdd. Mae dau bwyllgor sy'n gwasanaethu'r Bwrdd – y Pwyllgor Cynnwys a Chynulleidfaoedd, a'r Pwyllgor Cyllid a Materion Gweithredol. Mae pob Ymddiriedolwr yn aelod o un o'r pwyllgorau hyn, yn ddibynnol ar arbenigedd a diddordeb.

Mae'r pwyllgorau yn cyfarfod cyn bob cyfarfod llawn o'r Bwrdd.

### **Beth yw ymddiriedolwyr?**

Ymddiriedolwyr elusennau yw'r bobl sy'n rhannu'r cyfrifoldeb am lywodraethu elusen a chyfarwyddo sut mae'n cael ei rheoli a'i rhedeg. Maent weithiau yn cael eu galw'n ymddiriedolwyr, y bwrdd, cyfarwyddwyr neu enw arall.

Mae ymddiriedolwyr yn defnyddio eu sgiliau a'u profiad i gefnogi eu helusennau, gan eu helpu i gyflawni eu nodau. Mae ymddiriedolwyr hefyd yn aml yn dysgu sgiliau newydd yn ystod eu hamser ar y bwrdd.

## Manyleb Person

Rydym yn edrych am ymddiriedolwyr sydd â'r rhinweddau a'r sgiliau canlynol:

- Ymrwymiad i Theatr Genedlaethol Cymru ac i'r celfyddydau yng Nghymru
- Parodrwydd i neilltuo'r amser a'r ymdrech angenrheidiol
- Y gallu i wneud penderfyniadau da, yn annibynnol
- Y gallu i feddwl yn greadigol
- Parodrwydd i fynegi barn
- Deall a derbyn dyletswyddau a chyfrifoldebau cyfreithiol
- Y gallu i weithio'n effeithiol fel aelod o dîm
- Heb ei (g)wahardd rhag bod yn ymddiriedolwr elusen

Rydym yn dymuno penodi ymddiriedolwyr sydd ag arbenigedd neu brofiad yn y meysydd canlynol:

- Y gyfraith
- Theatr, fel ffurf artistig
- Gwaith ymgysylltu a gweithio'n agos gyda chymunedau
- Addysg
- Rheoli busnes

Fel y nodwyd eisoes, mae sicrhau cynrychiolaeth yn bwysig iawn i ni, felly os ydych yn uniaethu gydag un neu fwy o'r grwpiau sydd wedi eu tangynrychioli rydym yn eich annog i gyflwyno ffurflen mynegi

diddordeb, hyd yn oed os nad oes gennych yr arbenigeddau a nodir uchod.

Rydym yn awyddus i sicrhau bod ein Bwrdd mor gynhwysol a chynrychioliadol â phosib. Os ydych yn ystyried bod rhwystrau yn eich atal rhag mynegi diddordeb mewn bod yn Ymddiriedolwr, cysylltwch â ni i drafod, er mwyn i ni geisio adnabod ffyrdd o ddileu'r rhwystrau hynny. Mae'r manylion cyswllt ar waelod y ddogfen hon.

Nid oes angen profiad blaenorol o fod yn Ymddiriedolwr. Bydd proses sefydlu ar gyfer Ymddiriedolwyr newydd, ac fe all hyn gynnwys hyfforddiant a mentoriaeth. Bydd pob Ymddiriedolwr newydd hefyd yn cael ei baru gydag un o'r Ymddiriedolwyr presennol, er mwyn cael cefnogaeth a rhannu profiadau.

## **Rôl Ymddiriedolwr**

Mae dyletswyddau Ymddiriedolwyr wedi'u nodi yn y rhestr isod.

Mae'n bwysig pwysleisio bod y cyfrifoldebau yma'n cael eu rhannu gan yr holl Ymddiriedolwyr sy'n aelodau o'r Bwrdd. Nid oes disgwyl i Ymddiriedolwyr unigol gyflawni'r isod i gyd ar eu pennau eu hunain.

Mae cydweithio a thynnu ar arbenigeddau a phrofiadau gwahanol aelodau yn allweddol.

### **Mae dyletswyddau Ymddiriedolwr yn cynnwys:**

- Sicrhau bod y cwmni yn dilyn ei amcanion (dibenion) datganedig, fel y nodir yn ei ddogfen lywodraethol
- Sicrhau bod y cwmni yn cydymffurfio â'i ddogfen lywodraethol, cyfraith elusennol, cyfraith cwmnïau ac unrhyw ddeddfwriaeth neu reoliadau perthnasol eraill
- Sicrhau bod y sefydliad yn defnyddio'i adnoddau yn unig er mwyn cyflawni ei amcanion elusennol er budd y cyhoedd
- Sicrhau bod y sefydliad yn diffinio ei nodau ac yn gwerthuso perfformiad yn erbyn targedau y cytunwyd arnynt
- Diogelu enw da a gwerthoedd y sefydliad
- Sicrhau bod y sefydliad yn cael ei weinyddu'n effeithiol ac yn effeithlon, gan gynnwys bod â pholisïau a gweithdrefnau priodol ar waith



- Sicrhau sefydlogrwydd ariannol y sefydliad
- Amddiffyn a rheoli eiddo'r elusen a sicrhau buddsoddiad priodol o gronfeydd yr elusen
- Yn dilyn trefniadau priodol a ffurfiol ar gyfer penodi, goruchwylio, cefnogi, gwerthuso a phennu cydnabyddiaeth ariannol y Prif Weithredwr

Yn ychwanegol at y dyletswyddau statudol uchod, dylai pob Ymddiriedolwr ddefnyddio unrhyw sgiliau, gwybodaeth neu brofiad penodol sydd ganddo/ganddi i helpu Bwrdd yr Ymddiriedolwyr i ddod i benderfyniadau cadarn.

**Tâl:**

Rôl wirfoddol yw hon felly does dim tâl, ond mae modd hawlio costau. Gall hyn gynnwys costau teithio neu letya. Fe all hefyd gynnwys costau gofal plant, neu ddibynyddion eraill, er mwyn eich rhyddhau i fynychu'r cyfarfodydd.

**Lleoliad:**

Fel arfer, mae cyfarfodydd y Bwrdd yn cael eu cynnal yn Y Llwyfan, Caerfyrddin, ond mae opsiwn i Ymddiriedolwyr ymuno dros fideo ym mhob cyfarfod. Yn ystod y cyfnod presennol, mae cyfarfodydd yn cael eu cynnal ar blatfformau digidol (megis Zoom/Teams).

**Ymrwymiad Amser:**

Rhwng 8 a 10 diwrnod y flwyddyn – yn cynnwys cyfarfodydd llawn o'r Bwrdd, cyfarfodydd Pwyllgor, paratoi ar gyfer cyfarfodydd, a darparu cefnogaeth gyffredinol i swyddogion y cwmni. Yn achlysurol, mae'r Bwrdd yn cynnal sesiwn ychwanegol (all fod yn ddiwrnod cyfan) er mwyn cael trafodaeth fwy manwl ar gyfeiriad strategol y cwmni.

**Iaith:**

Cymraeg yw prif iaith y cwmni a'i Fwrdd, a chynhelir cyfarfodydd trwy gyfrwng y Gymraeg. Byddai modd i ni ddarparu cefnogaeth ychwanegol er mwyn hwyluso profiad dysgwr fel Ymddiriedolwr.

Os hoffech gael sgwrs anffurfiol ar unrhyw bwynt yn ystod y broses ymgeisio, mae croeso i chi gysylltu ag Angharad Jones Leefe:

[angharad.leefe@theatr.com](mailto:angharad.leefe@theatr.com)

07903 842554